

C O P P I E

DES MEMOIRES SE-
CRETS EN FORME DE
Missiue, Enuo yez de Bloys par vn
Polytique mal-asséuré à vn sien amy
aussi Polytique de ceste ville de paris.

*Avec la responce laquelle a esté descouuerte
sur vn Lacquais sortant de ceste ville,
lequel a donné l'adresse dudit Polytique,
au logis duquel lesdicts Memoires ont
esté trouuez.*

Contenant sommairement & au vray l'estat auquel
presentement sont les affaires du Roy &
de l'union Catholique & Generalle
de France.



M. D. LXXXIX.


COPY 13

THE MEMOIRS OF
GEORGE HENRY DOWD
OF THE UNIVERSITY OF
CAMBRIDGE
AND OF THE
LONDON SOCIETY

dup

not Cataloged

THE UNIVERSITY OF
CAMBRIDGE
LIBRARY



COPPIE DES MEMOIRES
*secrets, en forme de Missive, envoyez de
 Blois par un Polytique mal-assuré à
 un sien amy aussi Polytique de ceste
 ville de Paris.*

Avec la responce laquelle a esté descouverte sur un Laquais
 sortant de ceste ville, lequel a donné l'adresse dudit
 Polytique au logis duquel lesdicts
 Memoires ont esté tronuez.

Contenant sommairement & au vray l'estat auquel
 présentement sont les affaires du Roy & de l'v-
 nion Catholique & generale de France.

Monsieur, ie ne vous veux
 point remettre au deuant
 les bons fondemens & pi-
 lotis sur lesquels nostre re-
 ciproque & mutuelle amitié est de long
 temps bastie: car par la mention que
 j'en ferois, il sembleroit aussi que ie fis
 quelque doute d'icelle: Mais ie vous

veux coniuurer par là, de me fauoriser
de tant que de me vouloir par la pre-
miere asseuree commodité certiorer
de l'estat des affaires de par delà: com-
ment elles sont disposees, comment ai-
gries, comment adoucies, Brief quelle
opinion vous en auez: En vous suppliât
aussi de me dōner sur le tout vostre bō
aduis: afin que suiuant iceluy ie me re-
solue ou à bis ou à blanc, à suyure l'vn
ou l'autre party le plus asseuré & fauo-
rable. Et pour ne vous laisser matiere
ny occasion de m'esconduire en vne si
iuste priere, le me suis le premier mis en
mō deuoir de vous representer au vray
le cours des affaires de par deçà: afin que
ensemblemēt s'il vous plaist nous puis-
sions nous resoudre en quelque sorte
pour cōseruer, & nos vies, & nos moyēs
& si peu de cōmoditez que Dieu nous
a dispersez en ce miserable siecle: auquel
ie voyois les choses si embarassees que

d'oresnauant ie m'y mescognois totalement.

I. Le commenceray donques par nostre siege d'Orleans: duquel nous auõs receu nouuelles que les cõpagnies des Sieurs de Montigny & de Fargy y ont esté defaites par les assiegez: & les mulets de bagage de Monsieur le grand Prieur prins & emmenez dedans la ville. Le fils de Monsieur le Marechal de Matignon, & lesdicts Sieurs de Montigny & de Fargys, avec quelques autres Gentilshommes se sont sauuez à la fuite. Ie crains fort que cestè desroute sera cause que nostredit siege descâpera biẽ tost, si desia il n'est leuë: attendu que ja au parauant l'on nous auoit assureé que les forces du Roy s'y fondoient & diminuoient tous les iours à veüe d'œil: mesmemẽt que si ceux de dedans se fussent entrentendus qu'ils pouuoient d'un seul effort, tailler to^u les nostres en pie-

ces: mais qu'ils n'osoiēt librement faire
 sortie en gros: parce qu'ils n'estoient
 pas assurez du retour & de la rentree,
 pour la messiance grāde qui estoit par-
 my eux, laquelle targoit d'avantage
 les assiegeans que leurs propres forces.
 Nous sçauons biē que le Roy a des bōs
 seruiteurs dedans la ville: mais ils sont
 en beaucoup plus petit nombre que ses
 ennemis.

III.

Pour l'esgard de Rouen le Roy re-
 ceut ces iours passez lettres de Mōsieur
 de Carrouge, par lesquelles il mandoit
 que ceux du Haure auoiēt menacé Mes-
 sieurs de Rouē de ne plus leur laisser
 passer aucunes commoditez ny de vi-
 ures ny autrement: & de leur faire tous
 les desplaisirs dont ils se pourroient ad-
 niser, s'ils n'ébrassoient le party de l'v-
 nion & de la religion Catholique. Ce
 qu'entendu par ceux de Rouen, avec
 l'inclination qu'ils y auoient desia, Ils

protestèrent en deux assemblees generales qu'ils feirent entre eux, de ne recevoir ny admettre dedans leur ville garnisons ny forces aucunes de la part du Roy: disans que la derniere fois que il y fut, il leur apporta tant d'incômodité & au plat pays (sans parler de leurs femmes) qu'ils s'en ressenoient encores. Occasion, disoient-ils, qu'ils ne pouvoient maintenât que le souhaiter aussi loing d'eux que possible il en voudroit estre pres: & mesmement ils firent assavoir à mondit Sieur de Carouge qu'au cas qu'il fist semblant d'entreprendre quelque chose contre eux & leur resolution, qu'il ne s'y trouueroit pas le plus fort. Cela donna occasion audit Sieur de Carouge (comme il y en auoit assez de matiere) de despecher soudain vn courier au Roy pour, sur l'aduertissement de cecy luy demâder secours. Ce que le Roy luy accorda & luy enuoya

soudain quelques Suisses : mais si tost
 que ceux de Rouen en furent aduertis,
 quant & quant ils manderent ausdicts
 Suisses, que s'ils se vouloient appro-
 cher d'auantage qu'ils fissent leurs re-
 stamens de bonne heure. Ce contre-
 mandement receu par les Suisses (qui
 estoient desia à deux lieues de Rouen)
 eust tant de force sur eux qu'ils ne vou-
 lurent iamais passer outre, pour quel-
 que instance & commandement qu'on
 leur en peust faire. I I I I.

Or depuis cela, M^{rs}ieur de Carou-
 ge à tousiours esté veillé de si pres, que
 ie n'estime pas qu'il puisse ny ose d'o-
 resnauant remuer quelque chose. Et ce
 qui luy est & sera le plus contraire, c'est
 l'appuy & le secours que son propre
 fils donne aux habitans dudit Rouen,
 lequel s'est bandé contre son Pere pour
 embrasser la cause & le party desdits ha-
 bitans, violant par là toutes les Loix &
 de

de raison & de nature. II II I.

Quant à ceux de Troye, vous sçauèz comment depuis la mort de Monsieur de Guyse, ils se sont declarez ouuertement contre le Roy, pour le party des Catholiques: Ce qu'ils n'auoient pas fait du vivant dudit Sieur de Guyse. Enquoy le Roy a esté bien deceu de son expectation: car il en faisoit assésuré estat.

V.

Monsieur de Tinteuille depuis n'aguere auoit enuoyé audit Troye Monsieur de Villemorié pour tascher de les reconuertir au seruice du Roy: Mais si tost qu'ils eurent descouuert ses menees, ils le poursuiuirét si viuement, que sans vn soudain pre-aduertissement qu'il eust par l'un de ses gens (lequel en passant, fortuitement en auoit ouy quelque bruiet) indubitablement il y eust perdu la vie.

VI.

Auant-hier, ou le iour precedent,

B

vn marchand d'icy receut lettres dudict Troye, par lesquelles on luy mandoit d'un certain officier du Roy, lequel pour auoir parlé vn peu trop ouuertement des troubles de ce temps à l'aduantage du Roy, auoit esté massacré par la commune: Mais de cela nous n'en auons certitude que par lesdictes lettres: auxquelles ie ne donne point de foy. Il est bien vray qu'un artisan y fust tué tout au commencement de ce remuement, pour auoir seulement dit, oyant la mort de Monsieur de Guyse, qu'il estoit mortel comme vn autre. VII.

Quant à ceux de Poitiers le Roy a fort tasché de les gagner par promesses & belles offres: Mais on n'en a sceu tirer autre raison ny responce, si non que ils portent tant de respect à la memoire de deffunct Monsieur de Guyse, duquel ils tiennent la conseruation de leurs biens, la protection de leurs vies, & la

manutention de leur ville, qu'ils ne se
rengeront iamais au seruice de celuy
qui la opprimé.

VIII.

Ceux de Dijon n'ont pas mieux fait
que les autres : car aufsi tost qu'ils sceu-
rent la mort de Monsieur de Guyse, ils
constituerent prisonniers quelques of-
ficiers du Roy, & mirent garnisons aux
logis d'aucuns Conseilliers de leur Par-
lement.

IX.

Ceux d'Angers sont de mesme fa-
rine & aufsi peu zelez au seruice du Roy
que les autres : car ils ont tant faict que
ils se voyent aujourd'huy les plus forts.
Et combien que l'une & l'autre ville se
soit assez declaree, toutesfois le Roy
n'est pas encores hors d'esperance de les
ramener toutes deux à sa deuotion. Et
à cest effect il y a secretement enuoyé
quelques personages entendus & fa-
ctieux (que vous cognoissez) pour y pra-
tiquier des hommes & y negotier ce

qu'ils pourront.

X.

Pour l'esgard de la Picardie , excepté Saint Quentin & Boulongne, nous l'auons toute perdue, sans esperance de recouuremēt, si ce n'est à belles forces.

XI.

Les Picards ont prins vn passe-droiēt plus grand que les autres: car ils ont faiēt publier par tout le pais, defences tres-expresses à tous Seigneurs, Gentils-hommes & autres de quelque qualité qu'ils soyent, de monter à cheual, n'y s'armer en quelque façon que ce soit pour le seruice du roy: ains seulement pour l'vnion generale des Catholiques de la France. Et au cas que quelqu'un ou plusieurs vueillent cōtreuenir, & de faiēt qu'il contreuientent à telles deffēces, ils ont permis aux communes & à toutes personnes de se ruer sur eux, avec pouuoir & liberté de les assommer: & de là d'aller ruiner abbaye & foudroyer leurs maisons, ou cha

steaux, ce qu'ils ont tous protesté & iuré de faire & garder inuiolablement iusques à la mort.

XII.

Mais si vous voyez ainsi, le Roy grandement affligé par dehors: croyez qu'il ne l'est guere moins chez luy, tesmoing mesme que plusieurs de ses gardes se desbandent, & s'en vont trouuer les vns Monsieur du Maine, les autres le Cheualier d'Aumalle, & les autres s'en retournent à Paris.

XIII.

Et puis au plus fort de ses affaires, comment pensez vous que la mort de la Royne sa mere luy est venue mal à propos? Certes i'estime qu'il ne se peut assez exprimer. Aussi depuis icelle mort ie le trouue fort chāgé & tousiours fort mesfiant, voire de la moitié plus qu'il n'estoit au parauant: car il ne s'asseure quasi plus de personne, ce qui nous est vn grandissime malheur, voire le vray

moyen par lequel ses affaires & les nôtres receurent beaucoup de diminution & de retardement, & possible en fin vne ruine certaine & ineuitable.

XIIII.

Mais encor n'y a-il chose iusques icy qui ait rendu le Roy si pensif & estonné que la declaration de la Sorbonne, touchant la dispence qu'elle dit & assure que ses subiects ont de l'obeissance que ils luy deuoiēt, & de la fidelité qu'ils luy auoiēt iuree: A laquelle declaratiō, pensant apporter quelque antidote, & la rendre par là infructueuse, il assembla quelque nombre d'Euesques & d'autres Ecclesiastiques, pour leur faire declarer ladite Declaration & resolution nulle, & de nul effect, & du tout incompetente: Mais ils rapporterent tous au Roy qu'il les prioit d'une chose du tout impossible à eux, d'autant que la Sorbonne n'auoit rien decreté que suyuant &

conformément aux Saints Concils & Decrets, lesquels personne ne sçauoit contredire.

XV.

Or voila l'estat d'une partie des affaires de pardeça, lesquels ie vous ay representé sans flatterie & tels qu'ils s'ont à mon grád regret, mais la verité, la peur qui m'en reuient, l'obligation dont ie vous suis attenu, & le desir que i'ay que vous en vsiez de mesme en mon endroit, m'y ont necessairement contrainct.

Quant à l'autre partie elle vous apportera vn peu plus de contentement.

XVI.

Premierement la Royne d'Angleterre a offert au Roy secours, & de ses moyens, & de son pouuoir, en le priant de cōtinuer ses pointes, & disant qu'en tous cas elle luy promet tousiours de le releuer d'une mauuaise cheute, mais ie n'en fais pas de cela grand bouclier: car i'estime la consolation bien deso-

leelaquelle nē propose qu'un remede
au mal.

XVII.

Quant aux forces du Roy de Nauarre, nous en sommes tres-assurez : car outre qu'il l'auoit desia promis, il enuoya encor ces iours passez vers le Roy Monsieur, de Roquelaure, tāt pour l'asseurer de son seruice, qu'aussi pour les Trefues que le Roy & luy ont accordees respectiuement par ensemble.

XVIII.

Ledit Sieur de Roquelaure n'estoit pas seulement enuoyé pour ceste assurance & trefues : mais pour plusieurs autres chefs, lesquels nous ne sçauons encor ny quels il sōt, ny quelle resolution le Roy luy en a donné, d'autāt q̄ le Roy s'y tient le plus couuert qu'il peut : Mais il me semble qu'il seroit plus expedient pour luy qu'on s'apperceust de ce qu'il negotie avec ledit Roy de Nauarre, que de sa ruine & de la nostre : car les dissi-
mula-

mulations qu'il y veut apporter (pour passer outre a des choses qui seront de plus mal-aisee digestion a nos ennemis que lesdites trefues) le rendent plus tardif au bout hors de ses cōceptions, & desseins, & ce pendant nos affaires s'acculent, & demeurent là. Nos ennemis ne perdent point de temps, & nous le prodiguons esciemment.

XX.

L'on parle icy que le Roy veut faire declarer sō successeur à la courōne Monsieur le grand Prieur de France, mais ie ne vous en puis rien asseurer, sinon que il en est grand brui&: neantmoins ie le croy mal-aisement: Car par ce moyen le Roy necessiteroit ses affaires & son Roiaume à vne combustion tres-grande, d'autant qu'indubitablement ceste declaration seruiroit d'allumette à la maison de Bourbon pour faire la guerre au Roy, & ainsi il se creeroit tous-

iours d'auantage d'ennemis, dont il a desia sans cela, assez copieux nombre.

XX.

Monsieur de Montpensier & Monsieur le Prince son Fils sont en chemin pour venir trouuer le Roy, Ils sont suivis de beaucoup de Gentilshōmes, lesquels pour la plus part venoiēt icy, estimans que la mort de Monsieur de Guyse eust terminé la guerre, mais ils se verront trompez de tout le Ciel.

XXI.

Quant à Niort ie ne vous en mande rien, parce que vous sçauiez comme le tout s'y est passé, & que Monsieur de Malicorne y a laissé entrer les gens du Roy de Nauarre sans coup ferir.

XXII.

Quant à Chaalons en Champagne, vous sçauiez aussi (comme i'estime) qu'il est à la deuotion du Roy, & que Monsieur de Tinteuille est dedans qui y

commande. Toutesfois il est encor à craindre que ceux du dedans ne veuillent tenir deux cordes en leur arc (comme l'on dit) & se reseruer tousiours la puissance de se pouuoir réger du costé de l'un ou l'autre party, lequel ils verront avec le temps estre le plus fort.

L'occasion que i'ay de ceste mesfiance, c'est qu'ils ne veulent pas permettre que Monsieur de Tinteuille s'y rende le plus fort, dont le Roy a bon aduertissement. Occasion qu'il a commandé audit Sieur de Tinteuille par deux despesches consecutiues, qu'il y mette si bone garnison qu'il luy en puisse tousiours rendre bon compte. Dieu vueille qu'il le puisse ainsi effectuer: car la ville est de grandissime importance pour estre forte & bien munie comme vous scauez.

XXIII.

Pour le surplus, ledit Sieur de Tinteuille s'y comporte tres-bien. Il faict des

courfes tout aux enuirôs, il arreste tous les courriers. Il en a fouillé & retenu quelque temps deux qui estoient enuoyez de la part de Monsieur le Duc de Lorraine vers Monsieur d'Aumalle, & Messieurs de Paris. La substance des despêches qu'ils portoient, ie ne la icy pas, mais elle est assez aisee à presumer.

XXIII.

Quand M. de Tinteuille se sera acquis plus de creance & d'intelligence dans Chaalons, il promet au Roy qu'il fera des courfes iusques en Lorraine, ce qui resiouit tellement le Roy, que cela contrepoise vne partie des fascheries qu'il reçoit d'infinis autres endroits, lesquelles encor qu'elles soient grâdes & inestimables, si est-ce qu'il les dissimule le plus qu'il peut, mais ce n'est si dextrement qu'on ne remarque aisement en son visage assez de martel & d'inquietude, & possible beaucoup d'estonnement, &

de peur qu'il a, de se veoir si mal traicté
 en tant de villes de son Royaume, &
 crains, pour le recognoistre ingenuë-
 mēt, qu'il se courbera, & possible qu'en
 fin il succombera sous le fais de tant
 d'affaires & de tristesses qu'iceux trai-
 nent infailliblement apres soy.

XXV.

Et vous diray neantmoins qu'a voir
 noz actiōs & deportemēs, l'on ne nous
 iugeroit pas seulement affairez, ou biē
 l'on nous estimeroit quāt & quant pu-
 rement insensibles: car nous ne nous es-
 mouuons quasi non plus, que si le Roy
 estoit encor paisiblement iouissant de
 son Roiaume, & que ses ennemis & sub-
 iects ne se fussent aucunement rebellez
 contre lui.

XXVI.

Quand on dit au Roy que les Parisi-
 ens sōt tres-resolus à ceste guerre, Que
 ils y veulēt exposer tout leurs moyens,
 & le sāt d'eux & de leurs enfans, Qu'ils

sont bien à craindre, si ce n'est pour leur
 valeur, à tout le moins tant par ce qu'ils
 tiennent le principal nerf de la guerre
 par deuers eux, qui est l'argent, qu'aussi
 de Paris deppend la resolutiō generale
 de toute la France: Il se mocque de tout
 cela, & dit qu'il cognoist les Parisiens
 mieux qu'un homme de s^{on} Roiaume, Qu'il
 fasseure, puis que leur Roy Guisard est
 mort, que par consequent leur coura-
 ge est amorty: & qu'en tous cas qu'ils
 n'ont qu'une boutade sur leur pauc. Et
 pour l'esgard de l'argēt, Qu'ils s^{oyent} trop
 mal-aisez au desgel, Que tel qui fait pa-
 rade de dōner mil escuz, ne dōnera pas
 mil sols quand se viendra au fait & au
 prédre. Bref que sur son honneur, il res-
 pond que deuāt qui les ait laissé en trē-
 pe deux ou trois moys, qu'ils serōt con-
 traints de venir à lui & lui crier miseri-
 corde: & lors qu'il en sçaura bien tirer
 sa raison par vne punition si cruelle &

exemplaire qu'ils seruiront de frayeur
à tous leurs adherents & confederez.

XXVII.

Quand on lui parle de M. du Maine,
il dit qu'il sera biē empesché de se main-
tenir en son gouuernement, & qu'il se
gardera biē de leuer la teste plus hault,
Mais ie croy qu'il n'en dit pas tout ce
qu'il en pense.

XXVIII.

Que pleust à Dieu que nous fussiōs à
recommencer nos ieux: Las nous pen-
sions qu'ils se conuertiroient en ioyeu-
ses Comedies, mais ie crains que la fin
les nous fera appeller Tragedies bien
sanglantes.

Quant à moy ie n'en eus oncques
bonne esperance, & encores maintenāt
moins que iamais: Car ie ne veoy point
de moyen par lequel le Roy puisse re-
conquerir en toute sa vie, seulement
le dixme de ce qu'il a perdu en yn
moment de temps.

Que si aucuns de ses predecesseurs
 avec grandes finances, bonne quantité
 d'hommes, & l'assurance du cœur d'i-
 ceux (qui est vn rempart inexpugnable)
 ont esté bien employez & empeschez
 au recouurement d'une seule villette
 estrangee de leur obeissance, Quelle es-
 perance peut-il auioird'huy auoir de
 recouurer vne centaine de villes fortes
 & aguerries qui se sont declarees cōtre
 luy? Car (& ie le confesse à grand regret)
 il n'a ny fonds ny argent, ny esperance
 d'en auoir. Il n'auoit pas trois cens ho-
 mes aupres de lui quand les huit cens
 harquebusiers luy arriuerēt que Mon-
 sieur d'Espernon luy enuoya. Il n'a in-
 telligence quelconque en son Roiau-
 me: au contraire vous voyez que tous
 ses subiets & toutes ses villes s'vnissent
 pour se bander contre lui. De credence
 ie croy qu'il en aura d'oresnauant fort
 peu parmi les estrangers: encor qu'il
 nous

nous en promette grand secours. Mais pour moy, ie vous asseure que ce secours là est aussi loing de mon esperance, qu'il est proche de mon desir. premierement l'Italian ny viendra pas, l'Espagnol encor moins, l'Allemand se souuiendra du traictement qu'il y a receu, des promesses inaccomplies qu'on lui a faictes, des payements qu'on luy doit. Et sans tout cela: encor ne marchera-il qu'en vertu, de ce dōt nous auons faute, ou plustost penurie tres-extresme. Ce sont les raisons & particularitez qui me font quasi desesperer, que le Roy se puisse iamais sortir du Labyrinthe ou il s'est precipité & nous apres luy.

XXIX.

Mais ie crains de vous ennuyer de ce discours, auquel certes ie me suis d'auantage engage que ie n'auois enuie du commencement. Ie vous diray toutes

fois encor vn mot des Estatz lesquels
 sont concluz & arrestez : Car des Lun-
 dy dernier xvi. de ce mois, Monsieur
 l'Archeuesque de Bourges & Monsieur
 de Brissac feirent leurs Harangues tant
 pour le Clergé que pour la Noblesse. Je
 ne sçay pas le nom de celui qui fut esleu
 & subrogé au lieu du Preuoist des Mar-
 chands de Paris pour le tiers Estat. Quât
 aux deputez ils sont maintenant quasi
 tous partis de ceste ville: vray est qu'en
 la conclusion desdits Estats: il n'y en
 auoit pas la moitié de tous ceux qui y
 estoient au parauant la mort de Mon-
 sieur de Guise : Car elle apporta vn tel
 estonnement, que de cent & dix depu-
 tez qui estoient icy pour la Noblesse
 deuant Noel, apres la feste il ne sy en
 trouua plus que trentedeux: lesquels
 encor pour la pluspart n'auoient peu es-
 chapper. Voila ce qui se peut dire pour
 le present de nos affaires. Je vous supplie

encor vne autre fois bien humblement
 d'vser de reciproque enuers moy & ex-
 cuser la liberté de mon fil. A laquelle
 ie me suis laissé aller vn peu plus hardi-
 ment, pour l'assurance que nous a-
 uons pardeça que les parisiens ne font
 aucune difficulté ny refus de l'entree
 de leur ville: & qu'ils se rendent seule-
 ment difficiles pour la sortie (Ie trouue
 toutesfois ceste pratique fort nouuelle
 pour se bien assurer d'vne ville) Aussi
 que ie me faiçts biē fort que le porteur
 de la presente est tāt aduisé, qui se pren-
 dra biē garde d'eux: Car sās cela i'eusse
 esté possible aussi retenu à tout ce que
 ie vous ay recité que i'y ay esté libre &
 facile.

XXX.

Ainsi que i'acheuoishier ce propos,
 & que ie voulois fermer la presente, les
 nouuelles arriuerent en ceste ville que
 s'Parisiens (à l'imitation de ceux de

Dijon) auoient conſtituez priſonniers en la Baſtille tous les Preſidents & Cōſeillers de la Cour de Parlemēt (fort peu exceptez) Aucuns & plus probablēmēt dient qu'il n'y a eü d'emprisonnez que ceux qui leur eſtoïēt ſuſpects. Mais ſoit l'un ou l'autre vray, il me ſemble qu'ils n'ont pas ſeulement immité ceux de Dijon: mais qu'ils ont largement com-
menté ſur leurs œuures. Or on dit que les raiſons deſdites captures ſōt en premier lieu, par ce que la Cour de Parlemēt n'auoit voulu faire ny parfaire le procès à Dubelloy, s'excusant qu'elle auoit les mains liées: A quoy, dit-on, les Pariſiens reſpondirent qu'elle les auoit dōqués eü trop libres & legeres à condamner le Breton. L'autre raiſon par ce que les emprisonnez auoient eſté trop lents, voire & retifs à s'vnir avec eux, & à authoriſer les leuees d'hommes & de deniers qu'ils font. Ou poſſe

fible à cause de leurs vies & deportemens précédens. Aucuns disent encor, pour n'auoir voulu verifïer la déclaration de la Sorbonne.

XXXI.

Quoy que s'en soit le Roy fust fort estonné, receuât la nouuelle, disant que cela se tourneroit en conséquence pour ses autres villes, & qu'il s'esbaïssoit que ses Officiers de Paris ayent esté si peu forts & entenduz. Puis ayant quelque peu ruminé cela, Il se tourna vers Monsieur Do, & luy dist ces mots, quasi en le menassant, *Ce sont voz jeux Do, vous voyez maintenant que vous me perdez.*

XXXII.

Auiourd'huy le Roy a esté toute la matinee au conseil sur ce fait là: & tiens de bõne part qu'il en est si effrayé, avec le peu d'affeurâce qu'il auoit desia, qu'il a mis en deliberation s'il deuroit essargir les prisonniers qu'il tient: tant pour

la deliurance de tous ses Officiers, que pour arrester le cours des choses qui se brassent contre luy & son Estat.

Je vous supplie satisfaisant à ma priere, par mesme moyen me mander la verité de ce dernier chef par plus prompte voye, s'il vous plaist, que de ce porteur: car il seiournera quelque temps à Paris, où il est enuoyé pour apprédre la langue, & s'il peut quelque credence. Icy donques, Apres vous auoir bien humblement baisé les mains, Je priay le Seigneur vous prodiguer,

*Monseigneur ses saintes graces & me tenir aux vostres. X. De Bloys ce dixneu-
fiesme Ianuier. 1589.*

*Vostre seruiteur & tres-assuré
D. G.*

